

20-02-2026

आकाशवाणी

खबरां विजय बजाज कोला,

खास-खास खबरां:-

1. नर्मी दिल्ली दे भारत मंडपम च जारी इंडिया ए.आई सम्मेलन 2026 दा अज्ज 5मां ध्याड़ा ऐ ते अज्ज विश्व नेताएं दे सांझे घोषणा पत्र गी अपनाया जाहग।
2. प्रधानमंत्री नरेन्द्र मोदी होरें कल नर्मी दिल्ली च इंडिया ए.आई. इम्पैक्ट सम्मेलन च बपार जगत दे आला दर्जे दे नुमायंदें कन्नै गोलमेज वार्ता दी अध्यक्षता कीती।
3. चुनां आयोग नै 22एं राज्यें ते केन्द्र शासत प्रदेशें दे मुख्क चुनां अधिकारियें गी मतदाता सूचियें दी बशेश नजरसानी कन्नै सरबंधत तयारियें गी पूरा करने दा निर्देश दिता ऐ।
4. गृहमंत्री अमित शाह अज्ज असम दे कछार जिले च Vibrant विलेज प्रोग्राम दे दुए चरण दा शुभारम्भ करगंन।
5. अमरीका दे राष्ट्रपति डोनाल्ड ट्रम्प होरें शांति बोर्ड दे सदस्यें दी तरफा गाज़ा राहत पैकेज लेई 7 अरब अमरीकी डॉलर देने दी वचनबद्धताएं दा ऐलॉन कीता ऐ।

<><><><><>

India AI Impact

इंडिया ए.आई. इम्पैक्ट शिखर सम्मेलन नर्मी दिल्ली दे भारत मंडपम च चला करदा ऐ। अज्ज इस शिखर सम्मेलन दे 5में ध्याड़े सांझी वचनबद्धताएं दी तस्दीक करदे होई ते आलमी सतह उप्पर ए.आई शासन प्रणाली ते सैहयोग लेई सांझी रुपरेखा पर लौऽ पांदे होई, विश्व नेताएं दे घोषणा-पत्र गी अपनाया जाहग। अज्ज उच्ची सतह दियां GPAI काउंसल बैठकां बी लाइयां जागंन ते सदस्य देश ए.आई. पर बहु-पक्खी सैहयोग गी मजबूती देने आली प्राथमिताएं मूजब, हासल प्रगति दी समीक्षा करगंन। एहदे शा पहले कल प्रधानमंत्री नरेन्द्र मोदी होरें इस शिखर सम्मेलन दा औपचारिक उदघाटन कीता। 5एं दिनें दा एह शिखर सम्मेलन अज्ज सम्पन्न होग- जिसलें के इंडिया ए.आई. इम्पैक्ट एक्सपो कल रातीं 8 बजे तगर खुल्ली दी रोहग।

<><><><><>

PM -Round Table

प्रधानमंत्री नरेन्द्र मोदी होरें कल संजा इंडिया ए.आई. इम्पैक्ट सम्मेलन च बपार जगत दे आला दर्जे दे नुमायंदें कन्नै गोलमेज वार्ता दी अध्यक्षता कीती। सोशल मीडिया दी इक पोस्ट च श्री मोदी होरें आखेया ऐ जे बपार जगत दे मुख्क कार्यकारी अधिकारियें दी बैठक दे सम्मेलन च Artificial Intelligence, तकनीकें ते नमियें काहड्डे आले खेतरें दे बक्ख-बक्ख हितधारक इस सांझे मंच पर आए। उनें इस दरान होई दियें चर्चाएं गी ज्ञान बधाने आली ते दूरदर्शी करार दिदे होई दस्सेया जे एहदे च पूरी जिम्मेदारी दे कन्नै ए.आई दे विस्तार, वैश्विक सैहयोग दी मजबूती ते विकास दे मौके गी खोलने पर चेचा जोर दिता गया। प्रधानमंत्री होरें आखेया जे मनुक्खी प्रगति ते टिकाऊ विकास लेई ए.आई दा इस्तेमाल करने दी सांझी वचनबद्धता गी दिक्खियै उनेंगी बड़ी खुशी होई ऐ।

<><><><><>

Macron –Rafale

फ्रांसे दे राष्ट्रपति इमैनुएल मैक्रॉं होंरे आखेया ऐ जे फ्रांस ते भारत राफेल ज्हाजे पर सैहयोग बधाना चाहंदे न। कल नमी दिल्ली च इडिया ए.आई. इम्पैक्ट सम्मेलन दे दरान उ'ने दस्सेया जे भारत नै 114 राफेल लड़ाकु दा आर्डर देने ते उ'दे सांझे तौर पर उत्पादन च दिलचस्पी दस्सी ऐ। उ'ने आखेया जे इस नमें आर्डर च “मेक इन इंडिया” मुख् भूमिका निभाग। उ'ने दस्सेया जे भारत ते फ्रांस इक बशेश वैश्विक रणनीतिक सांझी करदे न- जेहड़ी दौने मुख् लेई बेजोड ऐ। सोशल मीडिया दी इक पोस्ट च राष्ट्रपति मैक्रॉं होंरे भारत जातरा दा वीडियो सांझा करदे होई धन्नवाद-भारत लिक्खेया ऐ। एहदे शा पैहले बदेश मंत्रालय नै आखेया हा जे उ'दी एह जातरा बड़ी महत्वपूर्ण ऐ ते इसने भारत ते फ्रांस दे सरबंधे गी इक खास रणनीतिक सांझा भ्याली दे स्तरै धोड़ी पुजाया ऐ।



Infiltration Bid

जम्मू खिते दे राजौरी जिले आहली कब्जा रेखा कन्ने लग्गदे सुंदरबनी इलाके च सुरक्षाबले घुसपैठ दी इक बड्डी कोशिश गी नाकाम बनाया ऐ। सोशल मीडिया दी इक पोस्ट च व्हाईट नाईट कोर नै जानकारी दिती जे Nathua Tibba इलाके च संदिग्ध नकलो-हरकत दिक्खी गई। इस पर फौरी कारवाई करदे होई सुरक्षाबले घुसपैठ दी कोशिश गी नाकाम बनाई दिता। तौंआई सुरक्षाबले आसेया चलाए गेदे इक सांझे अभियान च बले Nowshera Sehar इलाके दे रौहने आहले सचिन कुमार गी हिरासत च लैता ऐ। तपाशी दौरान ओदे कब्जे थमां गोली-बरुद बरामद होआ। जांच दौरान पता लग्गा ऐ जे ओह बन्ने पारा थमां होने आहली हथियारों दी तस्करी आहले कम्मै च शामिल हा ते ओह पाकिस्तान च बैठे दे आतंकवादिये दे सम्पर्क च बी ऐहा।



NIA Human

राष्ट्री जांच एजेंसी एन.आई.ए नै म्यांमार थमां भारती ते बदेशी एजेंट आसेया चलाए जा'रदे मनुक्खी तस्करी ते साइबर धोखाधड़ी रैकेट दे सरबंधे च 3 आरोपिये खलाफ आरोप-पत्र दाखल कीता ऐ। एजेंसी मूजब- आरोपिये च इक फरार संदिग्ध चीनी नागरिक बी शामिल ऐ। जांच दे दरान एह सामने आया जे एह त्रौने आरोपी अपने सैहयोगिये कन्ने मिलिये- कमजोर भारती नौजवाने दी म्यांमार च तस्करी कर'रदे हे। एन.आई.ए नै तस्करे दे दलाले दे इक संगठित नैटवर्क दा पर्दाफाश कीता ऐ- जेहड़ा गैर-कनूनी गतिविधिये गी अंजाम देया करदा हा।



ECI- SIR

भारती चुनां आयोग नै देसै दे 22ए राज्ये ते केन्द्र शासित प्रदेशे दे मुख् चुनां अधिकारिये गी मतदाता सूचिये दी बशेश नजरसानी कन्ने सरबंधत तयारिये गी पूरा करने दा निर्देश दिता ऐ। आयोग नै इ'ने राज्ये ते केन्द्र शासत प्रदेशे दे मुख् चुनांs अधिकारिये गी आखेया ऐ जे ओह इस सरबंधे च शुरुआती कम्म सबूरे करी लैन। मतदाता सूचिये दी बशेश नजरसानी आली एह प्रक्रिया इस बरे अप्रैल म्हीने थमां शुरु होने दी मेद ऐ। इने राज्ये ते केन्द्र शासित प्रदेशे च आंध्र-प्रदेश, अरुणाचल प्रदेश, चंडीगढ़, दादरा ते नगर हवेली- दमन ते दीव, हरियाणा, हिमाचल प्रदेश, जम्मू-कश्मीर, झारखंड, कर्नाटक, लद्दाख, महाराष्ट्र, मणिपुर- मेघालय, मिजोरम, नागालैंड, दिल्ली, ओडिशा, पंजाब, सिक्किम, त्रिपुरा, तेलंगाना ते उत्तराखंड शामिल न। आयोग नै आखेया ऐ जे मजूदा समे च 12 राज्ये ते केन्द्र शासत प्रदेशे च एस.आई.आर. दी प्रक्रिया चला करदी ऐ।



HM- Assam

गृहमंत्री अमित शाह अज्ज असम दे कछार जिले च जीवंत ग्राम कार्यक्रम दे दुए गेड़ दा शुभारम्भ करगंन। एह कार्यक्रम बन्ने आहले ग्राम च सुधार ते आजीविका दे मौके पैदा करने पर केन्द्रित ऐ। एह विकसित भारत- 2047 दे विजन आहला लेखा सुरक्षित बन्ने आहले समुदायें गी बढ़ावा दिंदा ऐ। माली बरे 2028-29 तगर चलने आहली इस योजना दी लागत 6 जहार 8 सौ करोड़ रपे शा मती ऐ। इस कार्यक्रम गी देश दे 15 राज्यें ते 2 केन्द्र शासित प्रदेशें च लागू कीता जाग। इस कार्यक्रम च बन्ने दी सुरक्षा- बन्ने पारा अपराधें दी रोकथाम ते अंतरूनी सुरक्षा गी मजबूत करने च महत्वपूर्ण योगदान मिलदा ऐ। गृहमंत्री होर भारत-बांगलादेश बन्नै पर स्थित सीमा सुरक्षा बल (बी.एस.एफ) दी बतूनपुर चौकी दा बी दौरा करगंन। शाह होर सुरक्षा बवस्था- अवैध अप्रवासन ते बन्नै पारा अपराधें पर अंकुश लाने लेई- बन्ने पर बाड़ लाने दी प्रगति दी समीक्षा बी करगंन। शाह होर बराक घाटी च भाजपा दी रैली गी सम्बोधित करदे होई पार्टी दे चुनां अभियान दा शुभारम्भ बी करगंन।



Board of Peace

अमरीका दी राजधानी वाशिंगटन डी.सी. च बोर्ड ऑफ पीस दी पैहली बैठक सम्पन्न होई। बैठक गी सम्बोधित करदे होई अमरीकी राष्ट्रपति डोनाल्ड ट्रम्प होरें बोर्ड दे मिम्बेरें आसेया गाजा राहत पैकेज आस्तै 7 अरब डॉलर शा मती दी प्रतिबद्धताएं दी घोषणा कीती। राष्ट्रपति ट्रम्प नै सर्व-सम्मति कन्नै पारित उस प्रस्ताव पर दस्तखत कीते- जेहदे च बोर्ड ऑफ पीस दे मार्ग-दर्शन आस्तै वित्तीय अखंडता ते पारदर्शिता दे सिद्धांतें गी स्थापित कीता गया ऐ। उ'नें आखेया जे संयुक्त राष्ट्र परिषद नै पिच्छले बरे नवम्बर च इस बोर्ड गी सर्व-सम्मति कन्नै मंजूरी दिती ही ते अमरीका नै इस महत्वपूर्ण नमें संगठन च 24 शा मते सदस्यें दा स्वागत कीता ऐ।



Railway Add Coaches

उत्तरी रेलवे दे जम्मू डिविजन नै 2 प्रमुख रेल गड्डियें च बाददू डब्बे दी घोषणा कीती ऐ, तां जे त्योहारें आहली रुतें दौरान यात्रियें दे बद्दे रश कन्नै निबड़ेया जाई सकै। जम्मू तवि राजधानी एक्सप्रेस च बाददू Third A.C. Coach लाया जाग। जिसलें के लम्मी दूरी आहली जम्मू तवि, कोलकाता एक्सप्रेस च जनरल क्लास कोच लाई जाग। एह सुविधा किश गै दिनें लेई होग। रेलवे प्रशासन नै यात्रियें गी अपील कीती ऐ जे ओह इनें बाददू सुविधाएं दा फायदा ठोआन ते यात्रा गी रमानदारी आहला बनान। एहदे लेई रेलवे आसेया लोडचदे सारे बंदोबस्त कीते गेदे न।



Ranji Trophy

घरेलू क्रिकेट च कर्नाटक 11एं बरे परैन्त रणजी ट्रॉफी दे फाईनल च पुज्जी गेई ऐ। टूर्नामेंट दे दुए सैमीफाईनल च कर्नाटक ते उत्तराखंड दा मुकाबला 5में ते अखीलें दिन झा रेहा। एह मैच लखनऊ च स्थित अटल बिहारी वाजपेयी एकाना क्रिकेट स्टेडियम च खेडेया गया। कर्नाटक नै पैहली पारी च 736 रन्ज बनाए- जिसले के उत्तराखंड दी टीम छडे 233 रन्ज गै बनाई सकी। उत्थै गै दुई पारी च कर्नाटक नै 323 रन्ज बनाए ते उत्तराखंड नै 5में ते अखीरले ध्याड़े 6एं विकेट पर 260 रन्ज

बनाए- जिस वजह करी मैच ड्रा होई गया। पैहली पारी च दोहरा शतत बनाने आले कर्नाटक दे कप्तान देवदत्त पडिक्कल गी
“Player of the Match” चुनेया गया। हुन फाईनल च कर्नाटक दा मुकाबला जम्मू-कश्मीर कन्ने होग। एह मैच 24 फरवरी
थमां कर्नाटक दे KSCA हुबली क्रिकेट ग्राउंड च खेडेया जाहग।

<><><><><>

Read by : **Vijay Bajaj**
Stand by : **Kunal Shrivatsa**
D.E.O. : **Rajni Devi**
Skilled : **Rajat Paul**
Editor : **Abhilasha Sharma**